

Stipendija „Mladen Čavaljuga“ za talentovane studente statistike (2024/25)

Ko je bio Mladen Čavaljuga?

Mladen Čavaljuga je rođen 1957. godine u Čapljini gdje je završio osnovno i srednje obrazovanje sa odličnim uspjehom (prosjek 5,0) uz aktivno bavljenje sportom i drugim vannastavnim aktivnostima. Student Ekonomskog fakulteta Univerziteta u Sarajevu je postao sticajem nepredviđenih okolnosti 1976. godine, ali se studiju posvetio vrlo ozbiljno, i diplomirao je u oktobru 1980. godine kao dobitnik Zlatne značke Univerziteta u Sarajevu Fonda „Hasan Brkić“ sa prosjekom 9,70 – kao najbolji student te generacije na Univerzitetu.

Daljnim sticajem životnih okolnosti, prvo zaposlenje je bilo na tadašnjem Institutu za socijalnu medicinu i organizaciju zdravstvene zaštite UMC Sarajevo od 1981. godine kao asistent-istraživač i asistent. Taj Institut je 1984. godine pripojen Medicinskom fakultetu Univerziteta u Sarajevu i time i Mladen Čavaljuga nastavlja svoj angažman osim u naučno-istraživačkom radu u oblastima ekonomike zdravstva, organizacije zdravstvene zaštite, demografije, biostatistike i primijenjene informatike i u nastavi za studente Postdiplomskog studija za predmete (zdravstvene/medicinske) statistike i biomedicinske informatike, uključujući demografiju i ekonomiku zdravstva. Od 1986. do 1989. godine je bio i Rukovodilac finansija i administracije Medicinskog fakulteta, a od 1989. do 1993. godine glavni analitičar i administrator za grupu od 28 naučno-istraživačkih projekata iz oblasti zdravstva i medicine za BiH tzv. Društveni cilj XIV.

Period 1992-1995. godina je proveo u Sarajevu, kao pripadnik Štaba Civilne zaštite i Armije BiH.

Zahvaljujući svom izvanrednom poznavanju stranih jezika, prvenstveno engleskog, od 1993. godine počinje raditi sa UN-om. U UNICEF se zapošljava 1996. godine, kao šef operacija – prvo za BiH, a zatim i za UNICEF Erbil (Irak). Tokom evakuacije svih uposlenika UN-a iz Iraka, obavljao je i dužnost šefa kancelarije UN-a za Irak, u Diyarbakiru (Turska). UN napušta 2005. godine kada se vraća u Sarajevo te počinje raditi kao direktor finansija i administracije / ekonomista u Triland Development, odnosno pravnim nasljednicima te firme, sve do svoje penzije 2022. godine.

Iako je Mladen Čavaljuga većinu svoje karijere uspješno gradio u finansijsko-administrativnim i menadžerskim poslovima, statistika je ostala njegova istinska strast. Njegov radni opus obogatila je primjena statistike na brojnim naučno-istraživačkim projektima, kao i podučavanje o finesama u primjeni statističkih metoda u istraživanjima u oblasti medicine i zdravstva. Podučavao je ne samo studente, već svakoga ko je želio učiti od njega – a takvih je bilo mnogo. Mladen nikada nije držao znanje samo za sebe, i uvijek je vjerovao da ima još prostora za učenje i napredak. Uvijek se može bolje.

U svojoj generaciji, kao i mnogim generacijama poslije njega, ostao je upamćen kao „mali“ student prve godine koji je tokom predavanja prekinuo čuvenog profesora Blažića i korigovao ga, bez imalo ustručavanja, zbog greške koju je profesor napravio pri izračunu Lorencove krive.

Iako ga formalna akademska karijera nije posebno privlačila, uvijek je nesebično dijelio svoje neizmerno znanje. U potpunosti je podržavao akademske puteve drugih, posebno svoje supruge, od prvog njihovog susreta.

Stipendiju je pokrenula supruga zbog davnog dogovora sa Mladenom da se i na taj način doprinese važnosti i značaju primjene statistike u svim drugim poljima, kao što je to Mladen učinio za medicinu i zdravstvo i biostatistiku.

Mladen nas je prerano napustio u avgustu 2023. godine.